

- 2) Ar redadeg kentañ, 10 vloaz 'zo bremañ, a oa bet roet dezhi dija priz an Ofis ha priz France 3, met an enor all eo evidomp o vezañ hiziv dirazoc'h evit degemer medalenn Skol Uhel ar Vro.
- 3) War patrom ar c'h/Korrika 'oa bet savet Ar Redadeg, an holl a oar.
Ar skouer-se eus Bro Euskadi en doa roet deomp ar c'hoant da grouiñ un darvoud evel-se e Breizh, hag alese Ar Redadeg kentañ, da geñver lid 30 vloaz Diwan e 2008.
- 4) Diouzhtu e oa bet soñjet ledanaat an darvoud evit tizhout ha bodañ ar muiañ a dud, tresañ an hentad evit klask tremen eus un eil skol d'eben (skolioù Diwan, Div Yezh, Dihun... a di da di)
- 5) gant ar pal bodañ an dud tro-dro d'ur youl hollek evit diskouez eo bras niver an dud, mennet ha laouen o labourat asambles evit hor yezh.
- 6) Ur gevredigezh distag hag emren a zo bet savet evit kas an eil Redadeg da benn, evit kenderc'hel da sikour ar skolioù Diwan, met ivez ledanaat tachenn ar brezhoneg.
- 7) Setu perak e oa rannet ar gounidoù e div lodenn : 50% da z/Diwan ha 50% evit arc'hantaouiñ raktresoù a bep seurt **gant ma vefent gouestlet da ziorren plas ar brezhoneg er vuhez pemdeziek hag e-maez ar skol.**
- 8) Ur Redadeg evit Breizh a-bezh eo, da lâret eo gant Bro Naoned e-barzh evel just. Bep gwech e tremenomp e Liger-Atlantel hag e kêr Kastell Duged Breizh.
- 9) War gresk ez a ar Redadeg abaoe ma oa bet krouet : eus 600 e 2008 betek 1819 km e 2018. Tremenet omp tro-dro 500 kumun pe ouzhpenn, an 3/4 anezho o deus prenet km(où).
- 10) Kantadoù a gevredigezhioù, embregerezhioù ha tud war o anv o deus kemeret perzh evit skoazellañ hor yezh.
- 11) Da geñver an arc'hant (gant ma vo kadarnaet disoc'hoù 2018) setu 341 000 € (tri c'hant unan mil euro ha daou ugent) roet da Ziwan ha muioc'h evit 300 000 € roet da 37 raktres a bep seurt. Da lâret eo 641 000€ (c'hwec'h kant unan mil euro ha daou ugent) en ur ober 10 vloaz. N'eo ket fall neketa !
- 12) Met ouzhpenn an arc'hant dastumet, ar pezh a lak ac'hanomp laouen eo ar spered, ar blijadur hag ar genskoazell a zo kalon an darvoud.
- 13) Laouen omp dre ma vez aozet gwelloc'h-gwellañ, dre ma vez muioc'h-mui a dud o kemer perzh ha dre ma vez kalz tud oc'h c'hortoz Ar Redadeg bep eil bloaz.
- 14) Koulskoude, 10 vloaz warlerc'h, ha daoust m'hon eus tapet skiant-prenet war a bep seurt tachennoù, **e chom Ar Redadeg ur pezh mell tra da aozañ.**
- 15) Etre 30 ha 50 den a youl vad a zo er jeu, a-pad 2 vloaz ha kantadoù anezho, n'omp ket evit gouzout resis pet a zo, (etre 500 ha 800 den, muioc'h marteze) e-pad ar sizhunvezioù a-raok, e-pad ha just goude pep Redadeg.

16) 2 zen a zo gopret leun amzer bremañ evit kas ar raktres da benn met ne vefe ket a re kaout muioc'h a c'hopriddi c'hoazh evit tizhout ar palioù a vez lakaet uheloc'h-uhelañ bep eil bloaz. Ret eo kaout un aozadur kreiz hag aozadurioù lec'hel frammet mat evit ma vefe kaset da-benn ar pezh zo ret ober.

17) Aozañ ur Redadeg a dalv ivez lakaat **arzourien a-bep seurt e-barzh ar jeu** : kanerien, kazetennerien, videourien, dañserien, sonerien, aktourien, grafourien, web mererien ha kement 'zo.

18) Ur benveg dastum arc'hant eo Ar Redadeg met ivez un doare da lakaat war well birvilh ar c'hrouiñ en hor yezh, dreist-holl gant ar re yaouank.

19) Ar Redadeg zo un abadenn leun a startijenn hag a zarempredoù etre an dud, un darvoud o klask bodañ an holl vretoned tomm o c'halon ouzh o yezh.

20) Ar Vedalenn-se a zo evito, evidomp holl neuze ! Dalc'homp mat neuze, ha kendalc'homp da redek betek ma vo hor yezh savetaet da vat, betek an trec'h !

21) mersi bras